



Nos morts

Monn-Deflorin Gion Bistgaun 5.8.1927 – 12.9.1998

Ils 12 da settember 1998 ha il zenn grond da S. Vigeli communicau tut nunspitgadamein la mort dil Gion Bistgaun. Igl ei segir stau per biars strusch da capir ch'ei hagi tuccau la sort al Gion Bistgaun, havevan gie biars aunc viu el a far ina spassegiada cuort avon ch'el ei spartius da nus e schizun forsa aunc dau ina cuorta paterlada cun el.

Il Gion Bistgaun ei naschius ils 5 d'uost 1927 sco 5avel affon da Hans Giachen e Turté Monn-Beer. Sia affonza ha el passentau cun ses 13 fargliuns a Cavorgia, nua ch'el ei era ius a scola. Da giuven ha el luvrau tier diversas interpresas da bagheggiar a Basilea, Turgovia ed Ursera. Plinavon eis el era staus plirs onns si Arosa sco viturin, nua ch'el menava entuorn hospes cun crotscha e cavals. Puspei turnaus anavos en siu vitg natal a Cavorgia ha el luvrau dabia onns duront il temps da stad tier las interpresas da bagheggiar Murer e Loretz sco chauffeur da camiun. Igl unviern targeva el lenna cun cavals da Cavorgia a Sedrun.

Ils 5 da november 1959 eis el maridaus cun la giuvna Benedicta nata Deflorin da Segnas e secasaus a Camischolas. La lèg ha purtau ad el treis affons, duas feglias ed in fegl. Ses affons han purtau ad el bia legria, mo era lavur. Igl onn 1966 ha il defunct entschiet ad ir ad alp sco nurser. Gl'unviern luvrava el tier ils runals. Igl onn 1975 ha el survegniu ina plazza cumpleina tier ils runals, nua ch'el ha lu era luvrau entochen sia pensiun igl onn 1992.

Suenter sia pensiun ha el saviu sededigar cumpletamein a ses numerus hobbis. Ses hobbis preferi eran encuirir cristallas ed ira a catscha. In plascher tut special haveva el dad ira alla catscha da capricorns. Suenter stuier spitgar plirs onns era el numnadamein vegnius elegius per la catscha da capricorns digl atun 1998, a la qualla el vess astgau sittar in capricorn capital ella Val Tujetsch. Cun sia nunspitgada mort ei quei giavisch deplorablamein buca vegnius adempius. Suenter ina cuorta, mo maligna malsogna, ha el bandunau nus ils 12 da settember gest duront siu temps preferiu, numnadamein il temps da catscha.

Car Gion Bistgaun, rauassa en pasch e sin seveser in di.